
Акафист иконе Божией Матери Одигитрия Югская

Молитвы предначинательные

Молитвами святых отец наших, Господи Иисусе Христе, Боже наш, помилуй нас, аминь.

Слава Тебе, Боже наш, слава Тебе.

Царю Небесный, Утешителю, Душе истины, Иже везде сый и вся исполняяй, Сокровище благих и жизни Подателю, прииди и вселися в ны, и очисти ны от всякия скверны, и спаси, Блаже, души наша.

Святый Боже, Святый Крепкий, Святый Безсмертный, помилуй нас. *Трижды.*

Слава Отцу и Сыну и Святому Духу, и ныне и присно и во веки веков. Аминь.

Пресвятая Троице, помилуй нас; Господи, очисти грехи наша; Владыко, прости беззакония наша; Святый, посети и исцели немощи наша, имене Твоего ради.

Господи, помилуй, *трижды.*

Слава Отцу и Сыну и Святому Духу, и ныне и присно и во веки веков. Аминь.

Отче наш, Иже еси на Небесех, да святится имя Твое, да придет Царствие Твое, да будет воля Твоя, яко на Небеси и на земли. Хлеб наш насущный даждь нам днесь; и остави нам долги наша, якоже и мы оставляем должником нашим; и не введи нас во искушение, но избави нас от лукаваго.

Господи, помилуй, *12,*

Приидите, поклонимся Цареві нашему Богу.

Приидите, поклонимся и припадём Христу, Цареві нашему Богу.

Приидите, поклонимся и припадём Самому Христу, Цареві и Богу нашему.

Псалом 50:

Помилуй мя, Бóже, по велицей милости Твоёй, и по мно́жеству щедро́т Твои́х очисти беззако́ние моё. Наипа́че омый мя от беззако́ния моего́, и от греха́ моего́ очисти мя; я́ко беззако́ние моё аз знаю́, и грех мой предо мно́ю есть вѣну. Тебе́ Еди́ному согреших и лука́вое пред Тобо́ю сотвори́х, я́ко да оправди́шия во словесе́х Твои́х, и победи́ши внегда́ суди́ти Ти. Се бо, в беззако́ниях зачат есмь, и во гресе́х роди́ мя ма́ти моя́. Се бо, и́стину возлюбил еси́; безвѣстная и та́йная премудрости Твоея́ явил ми еси́. Окропи́ши мя иссо́пом, и очи́щуся; омы́еши мя, и па́че сне́га убелю́ся. Слу́ху моему́ да́си ра́дость и весе́лие; возра́дуются ко́сти смире́нныя. Отврати́ лице́ Твоё́ от грех мои́х и вся беззако́ния моя́ очисти. Сѣрдце чи́сто сози́жди во мне, Бóже, и дух прав обнови́ во утробе мое́й. Не отвержи мене́ от лица́ Твоего́ и Ду́ха Твоего́ Свята́го не отыми́ от мене́. Возда́ждь ми ра́дость спасе́ния Твоего́ и Ду́хом Влады́чним утверди́ мя. Научу́ беззако́ныя путе́м Твои́м, и нечестивии к Тебе́ обратят́ся. Избави́ мя от крове́й, Бóже, Бóже спасе́ния моего́; возра́дуется язы́к мой правде Твоёй. Го́споди, устне́ мой отве́рзеши, и уста́ моя́ возвестят хвалу́ Твою́. Я́ко а́ще бы восхотѣл еси́ жѣртвы, дал бых у́бо: всесожже́ния не благоволи́ши. Жѣртва Бо́гу дух сокруше́н; сѣрдце сокруше́нно и смире́нно Бог не уничижи́т. Ублажи́, Го́споди, благоволе́нием Твои́м Сио́на, и да сози́ждутся стѣны́ Иерусали́мския. Тогда́ благоволи́ши жѣртву правды́, возноше́ние и всесожега́емая; тогда́ возложат на олта́рь Твой тельцы́.

Кондак 1

Взбранной Воеводе, Царице Небесе и земли, /
путеводящей верныя люди Своя к тихому и доброму
пристанищу, / похвальная пения приносим Ти раби Твои,
Богородице. / Ты же, Всемиловитая Заступнице, всех
притекающих к Тебе с верою, / от всякаго навета вражия
и злаго обстояния избави, да зовем Ти: //

**Радуйся, Благословенная Владычице, / мир и
благоденствие верным подающая.**

Икос 1

Ангел земный и человек небесный, Псково-Печерския
обители старец Дорофей, предъизбран бысть свыше, да
послужит прославлению образа Твоего, Пренепорочная
Владычице: ибо той непрестанно молися и восхваляше Тя
во вся дни живота своего. Мы же грешнии подражати ему
дерзаючи глаголем:

Радуйся, радость спасения миру Христа Бога родившая;
Радуйся, Престоле огнезрачный, Богомладенца во чреве
Своем носившая;

Радуйся, розго неувядаемая, к древу жизни нас
приводящая;

Радуйся, Купино неопалимая, Божественный Свет нам
открывающая.

Радуйся, Милосердная Мати, первородную клятву
разрушающая;

Радуйся, Неисчерпаемая милосердия бездно;

Радуйся, от глубины грехопадений нас избавляющая;

Радуйся, преступления Адама и Евы свободящая.

**Радуйся, Благословенная Владычице, / мир и
благоденствие верным подающая.**

Кондак 2

Видяще чудесное сияние от предивнаго образа Твоего, Пресвятая Дево, и слыша таинственный глас: «Иди в указанное Мною место, и взявши сущую тамо икону Мою, именуемую Одигитрия, гряди с нею во отечество твое, тамо бо добр себе покой обрящеши», преподобный Дорофей, благодарственно воспе Богу: **Аллилуия.**

Икос 2

Разумев посещение Царицы Небесныя, старец схимонах слезно со страхом молящеся и изшед из обители Псково-Печерския, путь творя на Югу реку, идеже достигнув избраннаго места чудо узрел еси: яко образ Богоматере Пречистыя озарися Небесным светом и недвижим бысть от места того. Узрев сие чудо, воспе Препоблагословенней: Радуйся, Путеводительнице Благая, на путь спасения нас наставляющая;

Радуйся, кораблю спасения плавающих в пучине житейских страстей;

Радуйся, Всемощная покровительнице, покровом Своея благодати нас осеняющая;

Радуйся, анкир спасения и тихое пристанище всем притекающим к Тебе;

Радуйся, Росо Небесная, милостию небесною от стези неправедныя избавляющая;

Радуйся, мосте Божественный, приводящий к Животу;

Радуйся, Светоносный облаче, благодатию Святаго Духа исполненный;

Радуйся, тихая Заступнице усердно молящихся Тебе.

Радуйся, Благословенная Владычице, / мир и благоденствие верным подающая.

Кондак 3

Сила изыде благодатная от образа Твоего, о Богомати, егда дошедши до места Тобою избранного и не хотяше далее идти рекла еси, Пречистая, к путь творящему старцу Дорофею: «Почто порываеши с места сего икону Мою? Место сие избранно и угодно Мне. Зде будет икона сия, и благодать Моя с нею во веки». Видяще сие попечение Царицы Небесныя о роде человечестем прослави Бога: **Аллилуия.**

Икос 3

Имея преподобный помышление в себе несумненное прославити образ Пресвятыя Девы Одигитрии на Юге чудотворениями явленный, сотвори Дом Божий в славу и честь Твою, да видят вси приходящие с верою чудеса преславная от Твоего Пречистаго образа и восхвалят Тя: Радуйся, певаемая от ангел и прославляемая от Серафим; Радуйся, лики Небесныя и земныя сочетававшая; Радуйся, моления наша приемлющая; Радуйся, Помоще всех притекающих к Тебе; Радуйся, Честнейшая Херувим и Славнейшая без сравнения Серафим; Радуйся, Архангельскую песнь приимшая; Радуйся, на спасение мира Богомладенца родившая; Радуйся, Мати Живота и Надеждо спасения вечнаго. **Радуйся, Благословенная Владычице, / мир и благоденствие верным подающая.**

Кондак 4

Бурю внутрь имея помышлений сумнительных, крестьянин некий злым духом одержим бываше и притекше к Тебе со умилением и слезами об избавлении

от демонскаго мучения моляшеся, и внезапно исцеление получи, воспе Христу Богу: **Аллилуия.**

Икос 4

Слышавше о чудесех от Югскаго образа Твоего, Царице Небесная, вси окрест живущии с верою и любовию прибегаше к Пречистому образу Твоему, и прияв от него исцеления от всех недугов душевных и телесных, возгласи Тебе:

Радуйся, Божественный Покрове всех притекающих к Тебе;

Радуйся, скорая Услышательнице в молитвах наших;

Радуйся, скорбящих радости, обидимых заступление;

Радуйся, в недужех скорое поможение;

Радуйся, милосердная Целительнице душ наших;

Радуйся, Святая Заступнице от действия диавольскаго избавляющая;

Радуйся, всякаго прибегающаго с верою и любовию приемлющая;

Радуйся, упование и предстательство верных.

Радуйся, Благословенная Владычице, / мир и благоденствие верным подающая.

Кондак 5

Боготечней звезде подобна явися икона Твоя, Владычице, егда девица со слезами много моляся пред чудотворным образом Твоим, прося об исцелении от слепоты душевныя и телесныя. Ты же Свет Небесныя радости той подала еси, открывая очи души и тела, да вси восхвалим Бога: **Аллилуия.**

Икос 5

Видевше токи чудес от Югския иконы Твоея, мнози людие стекахуся на поклонение к ней. Ты же, о Всепетая Дево, всем, по коегожде потребе милостивно подавала еси, да христоименитии людие с сокрушенным сердцем благодарственно прославляют Тя:

Радуйся, чудес неисчерпаемая бездно;

Радуйся, потребная изливающая яко мед и млеко;

Радуйся, Целительнице душ и телес наших;

Радуйся, Скоропослушливо внемлющая молитвам смиренных;

Радуйся, Милостивая, руку помощи требующим простирающая;

Радуйся, Всецарице, от недугов избавляющая;

Радуйся, Живоносный источнице Божия благодати;

Радуйся, Чаше Неиспиваемая, Ею же получаем спасение.

Радуйся, Благословенная Владычице, / мир и благоденствие верным подающая.

Кондак 6

Проповедают преславная чудеса Твоя, Царице Всепетая, вси людие православнии, ибо милость Свою источаеши на весь род христианский, спасая Покровом Своея благодати от всех наветов вражиих и молитвами Своими избавляя от всех бед и напастей, да поим Богу: **Аллилуия.**

Икос 6

Возсияла еси икона Твоя, Пречистая Дево, Югская Одигитрия, яко звезда пресветлая среди звезднаго неба множества чудотворных икон Твоих, имиже вся вселенная просвещается Божию благодатию, подвизая нас хвалебно зывати Ти:

Радуйся, первописанный образ Твой благословившая;
Радуйся, благодать Свою чрез чудотворныя иконы
явившая;
Радуйся, Покрове от всякаго зла всех притекающих к
Тебе;
Радуйся, Всех скорбящих радости и обидимых
заступнице;
Радуйся, яко Отраду и Утешение сердцам человеческим в
скорбех посылаеши;
Радуйся, Взыскание погибших от глубины греховныя;
Радуйся, Заступнице наша, иконою Твоею нам
помогающая;
Радуйся, кающихся грешников Споручнице Державная;
**Радуйся, Благословенная Владычице, / мир и
благоденствие верным подающая.**

Кондак 7

Хотящи явити милосердия Своего бездну, из глубины
греховныя извела еси всех притекающих к Тебе с верою,
да от смерти греховныя избавльшеся, на стези правыя
нози направим и восхвалим Бога: **Аллилуия.**

Икос 7

Новая и предивная чудеса явишася от иконы Твоея,
Владычице, яко расслабление ног имущии, мужи и жены,
прилежно с плачем моляхуся и молебное пение в церкви
творяху пред Пречистым образом Твоим, исцеление
прияша от своих болезней и прославляху Тя:
Радуйся, Милосердная Мати, пути спасительному
наставляющая;

Радуйся, Путеводительнице к исполнению Заповедей
Господних;
Радуйся, на стези правых грешных направляющая;
Радуйся, Твоими же молитвами на путь нечестивых не
идем;
Радуйся, путешествовати хотящим благословение
подающая;
Радуйся, в напастех внезапных скорая Помощнице;
Радуйся, Молитвеннице о нас непостыдная;
Радуйся, Одигитрие, Царице Всепетая.
**Радуйся, Благословенная Владычице, / мир и
благоденствие верным подающая.**

Кондак 8

Странно и преславно явился заступление Твое,
Богоизбранная Дево, егда избавление от мороваго
поветрия людие получиша, имея Тя предстательницу
теплейшую и молитвенницу непостыдную, тогда воспеша
Богу: **Аллилуия.**

Икос 8

В вышних пребывающи селениих и нижних не
отступаеши, пребыла еси в чистоте нетленна, бывши до
рождества, в рождестве и по рождеству Спасителя нашего
Дева. Темже Тя сосуд избранный видяще, девы, свечи
целомудрия носящи, восхваляют Тя:
Радуйся, Неувядаемый цвете Девства;
Радуйся, крине нетления и чистоты;
Радуйся, рождество и девство сочетавшая;
Радуйся, непорочно девство сохраняющая;
Радуйся, светоносный целомудрия столпе;

Радуйся, Дивная наставнице девства и чистоты;
Радуйся, Предивная целомудрия блюстительнице;
Радуйся, девствующих скорая Услышательнице.
**Радуйся, Благословенная Владычице, / мир и
благоденствие верным подающая.**

Кондак 9

Вси роди блажат Тя, Царице Всепетая, а наипаче девицы,
прославляющия Тя во псалмех и пениих духовных, и
просящия — да даруеши им достойнаго спутника жизни,
и создав малую Христову Церковь, воспоют Христу
Богу: **Аллилуия.**

Икос 9

Ветийство всякое земнородных не довлеет к
прославлению иконы Тобою явленных, иже за
неизреченный Твой дар и многую благодать, в Кане
Галилейстей испроси у Сына Своего сотворити чудо и тем
брак благословити. Тако и ныне вси прибегающии к
покрову Твоему обретают благодатныя дары и глаголют:
Радуйся, молитвою Твоею Церковь домашнюю
благословением Божиим венчающая;
Радуйся, любовь друг ко другу в союзе мира стяжати
помогающая;
Радуйся, в супружестве живущих умудряющая;
Радуйся, Твоим предстательством неувядаемый венец
славы получитьи сподобляющая;
Радуйся, Спорительнице хлебов, питающая от росы
Небесныя свыше;
Радуйся, Исполнение домов их всякия благодати;

Радуйся, дев Младопитательнице и матерей тихое
радование;

Радуйся, отроков дивное наставление.

**Радуйся, Благословенная Владычице, / мир и
благоденствие верным подающая.**

Кондак 10

Яко к спасительному и тихому пристанищу прибегаем к
Тебе, Дево Чистая, вси грехми обремененнии и со слезами
просим Тя: испроси у Христа Бога прощение всех
прегрешений наших, да изшедше из глубины греховныя,
достигнем Царствия Небеснаго и восхвалим Спаса Христа
Бога: **Аллилуия.**

Икос 10

Стеной и заступлением показася образ Твой честный
Одигитрии Югския, иноком православным, и всем
подвижником девства и чистоты во брани их к началом и
властем и миродержителем тьмы века сего, да ибавльшеся
от прелести греховныя прославим Тя:

Радуйся, Взбранная Воеводо Небесных сил;

Радуйся, Победительнице первыя клятвы;

Радуйся, яко рождеством Сына Твоего ад попрося;

Радуйся, яко предстательством Твоим смерть умертвися;

Радуйся, покаяния плачь приемлющая;

Радуйся, молитвеннице о нас грешных;

Радуйся, ходатаице о нас Непостыдная;

Радуйся, из глубины греховныя Избавительнице.

**Радуйся, Благословенная Владычице, / мир и
благоденствие верным подающая.**

Кондак 11

Пение наше смиренное от полноты души нашея приносимое не презри, Предивная Дево, ибо како мы возможем воспети вся преславная от Тебе бываемая грешными устами. Ты же явися нашей Споручницей от смертоноснаго греха, да спасаемии помощью Твоею, воскликнем Богу: **Аллилуия.**

Икос 11

Светлыя лучи чудес всему миру от иконы Твоя источаеши, грешных на путь спасения наставляеши, в скорбех защищаеши, от напастей избавляеши, прибегающих к Тебе в недужех скоро исцеляеши. Имуще таковую пречудную Путеводительницу ко спасению, радостно глаголем Ти:

Радуйся, Милостивая приятельнице молитв смиренных;

Радуйся, скорая Услышательнице кающихся грешников;

Радуйся, прошения наша во благо исполняющая;

Радуйся, скорбная сердца возвеселяющая;

Радуйся, во всех недужех исцеление подавающая;

Радуйся, слепым душевнеи и телеснеи очи открывающая;

Радуйся, расслабленные со одра болезни возставляющая;

Радуйся, злыя духи от человеков отгоняющая.

Радуйся, Благословенная Владычице, / мир и благоденствие верным подающая.

Кондак 12

Благодать Божию испроси нам у Христа Бога, да шествуем по стезям Заповедей Господних не уклоняся от праваго пути, и спасаеми Твоими молитвами избавимся вечнаго осуждения, и достигше Царства Небеснаго прославим Бога: **Аллилуия.**

Икос 12

Предстояще Тебе со умилением, и поюще преславная чудеса и велюю милость, явленную нам от Югскаго образа Твоего, величаем и прославляем непрестанно Тя, Владычице Всепетая, избавляющая нас от всякия скорби и печали, и радостно вопием:

Радуйся, Благодатная, Господь с Тобою;

Радуйся, Препрославленная от всех родов;

Радуйся, Честнейшая горних воинств;

Радуйся, Пресвятая Царице Неба и земли;

Радуйся, Престол Божий во чреве Своем вместившая;

Радуйся, непорочно Христа Спаса родившая;

Радуйся, Виновнице спасения нашего;

Радуйся, смертное наше естество в безсмертие облекшая.

Радуйся, Благословенная Владычице, / мир и благоденствие верным подающая.

Кондак 13 (трижды)

О Всепетая Мати, Благословенная Владычице, Путеводящая ко спасению всех с верою к Тебе притекающих, нынешнее приемши приношение, помози мирно прейти бурную пучину скорбнаго сего жития, спасая нас от всякия нужды и печали, и избави грядущаго вечнаго осуждения, да водворяся в райских селениях, воззовем: **Аллилуия.**

Кондак 1

Взбранной Воеводе, Царице Небесе и земли, /
путеводящей верныя люди Своя к тихому и доброму
пристанищу, / похвальная пения приносим Ти раби Твои,
Богородице. / Ты же, Всемиловитая Заступнице, всех
притекающих к Тебе с верою, / от всякаго навета вражия
и злаго обстояния избави, да зовем Ти: //

**Радуйся, Благословенная Владычице, / мир и
благоденствие верным подающая.**

Икос 1

Ангел земный и человек небесный, Псково-Печерския
обители старец Дорофей, предъизбран бысть свыше, да
послужит прославлению образа Твоего, Пренепорочная
Владычице: ибо той непрестанно молися и восхваляше Тя
во вся дни живота своего. Мы же грешнии подражати ему
дерзающе глаголем:

Радуйся, радость спасения миру Христа Бога родившая;
Радуйся, Престоле огнезрачный, Богомладенца во чреве
Своем носившая;

Радуйся, розго неувядаемая, к древу жизни нас
приводящая;

Радуйся, Купино неопалимая, Божественный Свет нам
открывающая.

Радуйся, Милосердная Мати, первородную клятву
разрушающая;

Радуйся, Неисчерпаемая милосердия бездно;

Радуйся, от глубины грехопадений нас избавляющая;

Радуйся, преступления Адама и Евы свободящая.

**Радуйся, Благословенная Владычице, / мир и
благоденствие верным подающая.**

Окончание

По прочтении канона и молитвы, чти:

Достойно есть яко воистинну блажити Тя, Богородицу, Присноблаженную и Пренепорочную и Матерь Бога нашего. Честнейшую Херувим и славнейшую без сравнения Серафим, без истления Бога Слова рождшую, сущую Богородицу Тя величаем.

Таже: Слава Отцѹ и Сыну и Святому Духу, и ныне и присно и во веки веков. Аминь:

Господи, помилуй, *трижды.*

И отпуст.

Господи, Иисусе Христе, Сыне Божий, молитв ради Пречистой Твоея Матере, преподобных и богоносных отец наших и всех святых, спаси и помилуй мя, грешнаго, яко Благ и Человеколюбец.